



UNIVERSITÄTS-
BIBLIOTHEK
PADERBORN

Universitätsbibliothek Paderborn

Vita B. Francisci Salesii, Episcopi Et Principis Gebennensivm Meritissimi

Maupas du Tour, Henri Chauchon de

Coloniæ Ubiorum, 1663

Breve Beatificationis Francisci De Sales, Episcopi Genevensis.

urn:nbn:de:hbz:466:1-42882



BREVE
BEATIFICATIONIS
FRANCISCI DE SALES,

Episcopi Genevensis.

ALEXANDER PAPA VII.

Ad perpetuam rei memoriam.

Spiritus sanctus, qui suo incomprehen-
sibili iudicio humilitatem atque infir-
mitatem nostram posuit regere Ec-
clesiam Dei, quum in Divinis Scripturis
viros gloriosos, nimirum Sanctos laudari
præcipit, eorumque sapientiam, & lau-
dem nunciari ab Ecclesia; docet Nos, at-
que illuminat, quid nostris etiam tempo-
ribus agere debeamus. Quapropter Apo-
stolicæ gubernationis curam, & cogitatio-
nes in id sollicitè intendimus, ut non modò
eorum, qui priscis, sed et qui proximis æ-
tati nostræ sæculis sanctitate, ac virtuti-
bus eximiè claruerunt, nomen & gloria
ubique gentium innotescat, pioque fide-
lium cultu & honore palàm veneretur.
Atque ideo tendentibus nuper in id ipsum

** 3

piis

piis Catholicorum Regum precibus, Præfulumque & Principum, aliorumque Christi famulorum votis, Nos libenter annuimus, prout matura consideratione præmissa, ad Omnipotentis Dei gloriam, Ecclesiæ Catholicæ decus, & præsidium in Domino salubriter expedire cognoscimus. Cùm itaque charissimus in Christo filius noster Ludovicus Francorum Rex Christianissimus, unà cum venerabilibus fratribus Archiepiscopis, & Episcopis, ac universo Clero, Proceribus, & Vniversitatibus studiorum generalium Regni Galliarum: nec non charissimæ in Christo filia nostræ, Anna Francorum Christianissima, & Henricetta Angliæ Illustris, Regina viduæ, ac dilectus filius nobilis vir Carolus Emanuel Sabaudia Dux, & Pedemontii Princeps, atque universus Ordo Monialium Visitationis Beatæ MARIÆ Virginis à seruo Dei Francisco de Sales Episcopo Genevensi institutus; præsertim verò dilectæ in Christo filia Superior & Moniales Monasterii Oppidi Annesii Genevensis Diocesis, impetraverint aliàs ab hac sancta Sede facultatem, ut processus fierent super non cultu, ac super inquisitione de vita, & moribus, heroicisque virtutibus, ac de miraculis,

quibus prædictus servus Dei Franciscus de Sales fulgere asserebatur. Cùmque postmodùm processus hujusmodi confectos Congregatio Venerabilium fratrum nostrorum S. R. E. Cardinalium sacris ritibus præposita maturè, acerrimèque discussit; ac de eorum validitate, ac relevantia constare declaraverit: Nempe de hujus Servi Dei vitæ eximiâ sanctitate, & de assiduo virtutum Theologicarum, cardinalium, cæterarumque omnium exercitio: immo ultra multiplicem, & miram hæreticorum ad veritatem Fidei Catholicæ conversionem; cùm novem miracula insigniora ejus obitum consecuta, communi quasi voce sanctitatem ejus testantia, plenè probari censuerit: quæ selecta ex processibus intercessione memorati Francisci ab omnipotenti Deo edita recensentur, ac præcipuè duorum mortuorum suscitatio, cæci nati illuminatio, contractorum, ac præclusorum à nativitate subita, ac perfecta sanatio. Nôsque declarationes hæc approbaverimus: ideòque cùm iidem Cardinales coram Nobis congregati, præviis etiam Consultorum suffragiis, unanimes affirmaverint, posse, quandocumque Nobis visum fuerit, ad solemnem hujus servi

Dei Canonizationem tutò procedi, atque interim indulgeri, ut idem Franciscus nuncupetur Beatus ac aliquibus in locis de eo tanquam de Confessore Pontifice Officium, & Missa recitari, ac solemniter celebrari possint. Hinc est quòd Nos piis supplicationibus inclinati Regis, Reginarum, ac Præsulum, qui etiam ad Nos venerabilem fratrem Henricum Episcopum Aniciensem hac super re nuper ablegarunt; nec non charissimæ in Christo filix nostræ Mariæ Theresiæ Regis Francorum Conjugis Christianissimæ, ac Sabaudia Ducis, aliorumque præfatorum, illis propensa benignitate libenter annuimus: ac de præfatorum Cardinalium consilio, & unanimi assensu, auctoritate Apostolica, tenore litterarum præsentium, indulgemus, ut Dei servus Franciscus de Sales, olim Episcopus Genevensis, in posterum Beati nomine nuncupetur, ejusque corpus & reliquiæ venerationi fidelium (non tamen in processibus circumferenda) exponantur; Imagines quoque radiis seu splendorebus exornentur, atque de eo celebretur Officium & Missa de Confessore Pontifice, singulis annis, juxta rubricas Breviarii, & Missalis Romani, die scilicet xxix Januarii,

nuarii,

nuarii, qua ejus corporis depositio in Ecclesia Monialium sanctissimæ Visitationis, Annesii in Sabaudia celebrata fuit. Hæc verò concedimus in locis dumtaxat infra-scriptis: nempe in omnibus Ecclesiis Monialium dicti Ordinis sanctissimæ Visitationis, quem Beatus Franciscus instituit: in Cathedrali templo Lugduni, ubi diem clausit extremum: in Cathedrali Annesiensi, ubi sedit Antistes: in matrice Ecclesia loci de Sales, ubi natus est; & quidem sub ritu duplici majori: in Oppido verò Annesii, totaque Diœcesi Genevensi, sub duplici minori, ac tam à sæcularibus, quàm à regularibus utriusque sexûs; ac etiam à Sacerdotibus quibuscumque eò confluentibus, quantum ad Missas attinet. Præter eà, præsentidumtaxat anno, à datis hisce literis inchoando, in supradictis, atque in singulis Cathedralibus Ecclesiis Regni Galliarum, ac Sabaudia & Pedemontii ditionis, solemnia Beatificationis hujus cum Officio, & Missa sub ritu duplici majori, die à locorum Ordinariis constitutâ, & intra sex menses promulgandâ, celebrandi facultatem impartimur: Romæ verò in Ecclesiis S. Ludovici Gallicanæ, & sanctæ Sindonis Sabaudia, ac Pedemontane

XVIII BREVE BEATIFICATIONIS.
Nationum, ac sanctissime Trinitatis in
Monte Pincio, solemnia hujusce Beatifi-
cationis intra bimestre proximum, post-
quam tamen illa in Basilica Principis Apo-
stolorum celebrata fuerint, pariter cele-
brari concedimus. Non obstantibus Con-
stitutionibus, & ordinationibus Apo-
stolicis, ac quibuscumque decretis super non
cultu, seu aliàs latis, aut promulgatis, cete-
risque contrariis quibuscumque. Volu-
mus autem, ut harum literarum transum-
ptis, etiam impressis, manu Secretarii præ-
dictæ Congregationis Cardinalium sacris
Ritibus præpositorum subscriptis, & sigil-
lo Præfecti ejusdem Congregationis mu-
nitis, eadem prorsus fides ab omnibus, ubi-
que tam in judicio, quàm extra adhibea-
tur, quæ præsentibus ipsis adhiberetur, si
forent exhibitæ, vel ostensæ. Dat. Romæ
apud S. MARIAM Majorem sub an-
nulo Piscatoris, die xxviii Decembris,
M DC. LXI, Pontificatûs Nostri anno
septimo.

S. UGOLINUS.

INTER-